

四庫全書

經部

欽定四庫全書

經部

陳氏尚書詳解卷三

四十九

詳校官監察御史_臣查善長

通政使司副使_臣莫瞻菴覆勘

總校官編修_臣王燕緒

校對官中書_臣田尹衡

謄錄監生_臣楊文憲

欽定四庫全書

尚書詳解卷三十九

宋 陳經 撰

立政

周書

立政之篇無非戒以用人之事也不曰用人而曰立
政何也易曰制而用之謂之法推而行之存乎人記
曰文武之政布在方策其人存則其政舉人主雖有法
度紀綱纖悉委曲無不詳盡苟不得其人而用之則

法度豈能自行哉是亦為虛具而已矣故戒其君以用人而以立政名篇蓋得人則政自立成王幼冲之日因流言之變不免置疑于周公則知人之明成王或者猶未之盡既不能知人安能用人此人主之切要周公所以拳拳於此篇之書也

周公作立政

孔子序此書亦與周公作無逸同直書之而其意自顯也古者大臣之戒君本末無不兼舉無逸之書乃

人主治身之本原而立政一書乃人主出治之大要二者亦未始不相為用蓋專於逸樂者遊心于多慾其志與小人合不知君子之可親能用人以立政自非憂勤于治心原昭晰者不能也周公以無逸戒其前又以立政繼其後而人主所以自治出治之大端盡矣召公得周公作無逸之意而公劉之詩專戒以民事得周公立政之書而卷阿之詩專戒以求賢所以同心輔政者其在茲歟

周公若曰拜手稽首告嗣天子王矣用咸戒于王曰王左右常伯常任準人綴衣虎賁周公曰嗚呼休茲知恤鮮哉

周公拜手稽首致敬盡禮所以起成王之敬心欲其聽之專也告嗣天子王矣子曰嗣指成王也嗣天子今已為王矣與前幼冲之時不同居王者之位必有以盡王者之責王者之責莫重於任人故周公盡舉以告之謂之咸戒無有不盡之意也既言其大者又

言其小者曰在王之左右日與之親近者其大則有
常伯牧民之長者常任乃任事之公卿也準人乃守
法之有司也其小則有綴衣掌王衣服者虎賁以武
力事王者周公又從而嘆之曰休茲用人之道實乃
為政之至美者也能知以此為憂者亦鮮矣惟其知
恤則不敢輕于用人此數句乃立政一篇之綱領也
雖然常伯常任準人三宅之大臣周公奚為舉此以
戒成王哉三宅之大臣成王出而臨朝與之講論治

道者也其見之時持少綴衣虎賁之臣成王退朝與之褻近者也其見之時多苟惟大臣之是擇而忽略於褻近之小臣則讒諂面諛便嬖側媚之臣間于其間人主日與不正人居則其氣味之所薰染亦將流於不正矣穆王命伯冏為太僕正必及于文武之時小大之臣咸懷忠良侍御僕從罔非正人此先王所以養成君德者在此而已漢世猶有古意禁闥之中大抵皆以士人居之如吾丘壽王司馬相如之徒歲

時宿衛亦擇其士民之良者自是而後此意寢薄人
主日與宦官女子武夫姦人相處其視周官之戒亦
已戾矣

古之人迪惟有夏乃有室大競籲俊尊上帝迪知忱恂
于九德之行乃敢告教厥后曰拜手稽首后矣曰宅乃
事宅乃牧宅乃準茲惟后矣謀面用丕訓德則乃宅人
茲乃三宅無義民桀德惟乃弗作往任是惟暴德罔後
周公既言知此為憂者鮮則又言古之人惟有夏之

君能蹈行之有室之所以競強而至于大治者皆自
顓俊尊上帝也顓招呼也顓俊奚與于尊上帝蓋天
下之事無一而非天之事位天位也職天職也祿天
祿也事天工也苟得其賢者布于百執事之列則事
得其敘民得其理物得其所和豈非尊上帝者在此歟
或者不知此意賢有德則棄而不用小人則用之使
天職天工天位天祿皆紊亂而穢德自彰聞矣方且
飾玉帛築盛曰吾以事天也不知事天者果在于

實乎抑在虛文乎然籲俊尊上帝則賢者既至矣又當知之愈深信之愈篤九德即臯陶所陳之九德也迪知者迪已之所踐履而知之如臯陶所謂亦行有九德亦言其人有德是也忱恂者虛心至誠以待之如伯益所謂任賢勿貳是也如知之深信之篤則九德之人其剛其柔其正直無不一一知其情性有夏之君既能如此故有夏之臣方敢進用人之戒人君必有用人之誠則人臣進用人之戒君未有此誠則

人臣豈敢諫雖諫而無益矣曰拜手稽首后矣亦與
周公拜手稽首告嗣天子王矣同意人君用人之道
無有窮已不可謂迪知忱恂于九德之行如是而足
矣又須能官使人材使位與德稱而可宅居也安也
有常任之才者然後可以宅乃事之職有常伯之才
者然後可以宅乃牧之職有準人之才者然後可以
宅乃準之職禹曰知人則哲能官人棧樸之詩曰文
王能官人能知人而不能官人則用非其所能能非

所用故曰宅乃事宅乃牧宅乃準茲惟后矣三宅各當其位各得其人為君之道盡于此矣此所以宅人之要則又在乎謀面丕訓德也大順德之人謀之人以為未足又面之以已詢之左右詢之大夫詢之國人比謀之也觀其言辭觀其容止觀其行事比面之也人與已相參以此用丕訓德之人則以之宅人無不各安其位矣是皆有夏之君臣如此自其子孫如桀者不能法乃祖之所以用人故三宅之中無有義民

義民者知義理之人謂賢者也三宅之所以無義民以桀德不能如往昔所以任人之道既不能如往昔任人之道則所任者皆暴德之人謂凶德也用非其人所以無後而用殄厥世此治亂得失之明驗也

亦越成湯陟丕釐上帝之耿命乃用三有宅克即宅曰三有俊克即俊嚴惟丕式克用三宅三俊其在商邑用協于厥邑其在四方用丕式見德

陟升也對黜而言之桀則升湯矣桀不作往任而無

後於是成湯升為天子耿明也釐理也上帝之明命
至桀而不得其理湯之升也不釐上帝之耿命則有
作新之意所謂上帝之明命安在哉即求諸吾心可
也吾之心昭然瑩徹無一毫之累則賢俊之心在是
則上帝之心亦在是籲俊尊上帝者即此而尊之也
乃用三有宅謂宅乃事宅乃牧宅乃準用三宅之人
而能即宅是德與位稱者也曰三有俊謂稱其人之
有乃事乃牧乃準之才而能即俊是才與名孚也已

用之三宅既各當其位未用之三俊又各當其才豈
非丕釐上帝之耿命端在於此乎既有以得賢者之
用又有以安賢者之心豈為高爵厚祿而來上以正
其君下以澤其民是賢者之心也苟人主無尊德樂
道之意不能敬其所言法其所為則賢者不能一朝居
故成湯能嚴敬之以禮貌思之於心無非所以大法
賢者之所為如湯學於伊尹是也如成王畏相是也
如此則能用三宅三俊矣人主之德見于用賢者如

此則大明麗天無幽不燭其在商邑之近也則協於厥邑和而無乖其在四方之遠也則大法上天之所為而見湯之德聖人之德初無遠近之殊而天下之感聖人之德者自有遠近之異協於厥邑其視丕式見德則深矣

嗚呼其在受德啓惟羞刑暴德之人同於厥邦乃惟庶習逸德之人同于厥政帝欽罰之乃侔我有夏式商受命奄甸萬姓

賢者強也亦曰昏也受不能如湯之丕釐上帝耿命
乃自強于昏德紂之德既昏則與君子不合而三宅
三俊之賢皆遠去與小人合羞刑暴德者與夫庶習
逸德者則進用之羞進也惟進用刑與暴德人以同
厥邦又惟庶習逸德放逸之德習者非一與斯人而
同厥政帝欽罰之受之德在於不敬處不敬非天也
故天以敬罰之以敬罰不敬即春秋用賢治不肖不
以亂易亂之意也乃俾我有夏使我周家有華夏之

國式法成湯當時所以受天命而奄治萬姓文武之心與湯同紂之意與桀同故文武之伐紂亦猶成湯之伐桀故曰式商受命

亦越文王武王克知三有宅心灼見三有俊心以敬事上帝立民長伯

文王武王之興也能知三有宅之心又能灼見三有俊之心然則紂曷為不能克知灼見而文武為能克知灼見蓋文武克知已之心故能克知三宅之心文

武灼見已之心故能灼見三俊之心臯陶所謂亦行
有九德禮記所謂取人以身文武不能自知自見已
之心則一心之間毫釐有間形于事物之際是非易
位矣安能知人乎有堯之聰明文思必能知舜有舜之
濬哲文明必能知禹臯陶有文武則必能克知灼見三
宅三俊此知人之道先于自知者也上帝高遠奚自
而敬事之下民之衆奚自而治之文武即其克知三
宅灼見三俊者而敬事上帝是此心與天合也文武

即其克灼者而立民長伯封建諸侯是此心與人合也天人之勢雖不同而其實則根於文武之心嗚呼天下未嘗無賢才也有夏弗作往任而三宅無義民成湯興而克即宅克即俊紂之所用者暴德逸德之人而文武興則克知灼見三宅三俊皆為用是豈宅俊隱于桀紂之世而獨興于文武之時乎易曰水流濕火就燥雲從龍風從虎聖人作而萬物覩本乎天者親上本乎地者親下則各從其類也聖賢之會遇

各以氣類相感自然之理也

立政任人準夫牧作三事虎賁綴衣趣馬小尹左右攜僕百司庶府大都小伯藝人表臣百司太史尹伯庶常吉士司徒司馬司空亞旅夷微盧烝三亳阪尹

此周公詳言文武所以得人凡小大遠近內外無不各得其人也謂文武之所以立政者初不在於紀綱制度之間而皆惟得人之為要任人即常任也準夫即準人也牧即常伯也三宅之人所任之事作書者

互文耳作三事謂三宅之事此王朝之大臣也虎賁以武力衛王者也綴衣掌王衣服者也趣馬掌馬者小尹小官之長也左右攜僕執持器物之臣百司庶府府庫藏吏在內之百司也大都小伯治大都小都之長也藝人執技藝以事上者表臣為表幹者百司在外之百官有司也太史下大夫掌六典之貳尹伯長官若周禮每官各有長庶常吉士自綴衣而下無非常久有吉德之士君子則用心有常而為吉小人則

用心不常而為凶臯陶曰彰厥有常吉哉亦此意也
司徒司馬司空又舉文武當時所以擇人為諸侯之
三卿者與夫為亞大夫者為旅士者夷微盧烝四國
也三亳商之故地分而為三也與夫阪險之地皆立
官以長之故曰尹言夷微盧烝也三亳也阪險之地
也皆有尹無不得人以此見文武之時不特內而王
朝小大之臣皆得其人外而諸侯之國遠近之臣亦
無不得人今取周禮而讀之下至于醯人醢人與夫

邦國都鄙建其長立其屬可以見成周內外小大遠近無不得人也雖然文武以一人之聰明豈能周知遠近內外小大之臣哉蓋聖人之治自有體統人主之職論一相一相之職統百官想夫王朝之上如三宅之臣人主之所親擇而其下之小大之臣則又合委之三宅者也不然何以高宗戒傅說曰惟暨乃僚罔不同心穆王命伯冏曰慎簡乃僚無以巧言令色哉觀文武之時亦可謂盛矣不特文武為然而周人

之治亦莫不然君奭之書曰矧咸奔走惟茲惟德稱
古人所以為天下者上自公卿下至執事之職無非
賢者孟子曰在王所者長幼卑尊皆薛居州王誰與
為不善故曰一薛居州獨如宋王何

文王惟克厥宅心乃克立茲常事司牧人以克俊有德
文王罔攸兼子庶言庶獄庶慎惟有司之牧夫是訓用
違庶獄庶慎文王罔敢知于茲

前既合文武而言之此又分言之蓋遠之可監不若

近之尤詳舉夏商之事則略言之夏商遠者也舉文
武之事則詳言之文武近者也周公言文武當時所
以得人之多自三宅而下内外小大無不得人者豈
有他術哉蓋自吾之一心求之而已文武不求之于
心而一一求之于人則得於此必有失於彼者矣惟
文武能宅其心于湛然無營無為之地故人之賢
否邪正無不克知灼見故能立茲常事之官謂任事
之臣若前所為常任是也立茲司牧人即養民之官

若前所謂常伯是也常事司牧人皆是俊而有德者言常伯常任而不及準人者舉其大槩則準人亦在其中矣文王克厥宅心立茲常事司牧人皆俊有德此則知人之明矣知人者既得人而稱其任則用人者必當委諸人以專其任庶言者謂謨謀議論之臣也庶獄者聽斷獄訟之事也庶慎者機密慎重之事也庶言庶獄庶慎文王一委之于人而無所兼人主自有人主之責臣下自有臣下之責人主之責在

宅心以知人也臣下之責在分職以治其庶言庶獄
庶慎也若人主而侵臣之職兼人臣之事則不惟一
人之聰明有限而臣下亦無所任其責矣文王既得
其人則一以委之而已無與焉惟有司之牧夫在朝
而有司存與乎在外而養民者凡事之所當用而從
者與其不當用而違者文王一順其所為庶獄庶慎
文王皆不敢知于茲不特不敢兼之而已而亦不敢
知之焉此人主用人貴乎專也蓋所謂無為而治者

在此而已後世不知此意若太宗兼行將相事甚者如隋文帝衛士傳餐而食則臣下豈得以任其責哉亦越武王率惟救功不敢替厥義德率惟謀從容德以並受此丕丕基

此言武王之心即文王之心也文王當時救寧之功則有義德焉如所謂爰整其旅以遏徂莒所以裁正天下之不正者也武王則率惟其救功不敢替文王之義德武王之義德即文王之義德也文王當時遠

大之謀則有容德焉如所謂即康功田功懷保小民
所以安天下之不安者也武王則率惟其謀以從文
王之容德即文王之容德也率者循其事也惟者思
之於心也武王之見于率其伐功與夫偃武修文皆
義德容德之循乎文王者也文武之心合而為一故
能並受丕丕莫大之業然義德謂之功容德謂之謀
義德謂之不敢替容德謂從可以見征伐之功聖人
之不得已安民之謀乃聖人之本心也立政之書大

率言用人之事上文言文王宅心以用人至于武王則曰不敢替義德從容德何也周公之言體用兼舉有文王之宅心乃能用武王不敢替義德從容德正為用人地也故宅心以用人者所以為武王之本于文王言其本于武王言其用本末之互見也

嗚呼孺子王矣繼自今我其立政立事準人牧夫我其克灼知厥若丕乃俾亂相我受民和我庶獄庶愼時則勿有間之自一話一言我則末惟成德之彥以又我受

民

周公之言何其有敘也既言有夏之籲俊成湯之乃
用三宅文武之克知灼見矣故此又望成王之宅厥
心先嘆而後言曰孺子今已為王矣與前日幼冲之
時不同矣繼自今謂自今以始至于後日我其立政
謂政必由已而出也立事準人牧夫我其克灼知厥
若謂人必由已而用也政不由已而出則禮樂征伐
之柄至于下移矣人不由已而用則進退予奪不在

我矣自古柔弱之主權柄下移則雖有人才亦不得而用之今告成王以我其立政則凡國之政令皆必自己出政既自己出政之大者莫大於用人故人亦必由已而用立事者常任也準人者乃準也牧夫者常伯也此三宅之臣必自我灼知其所順灼知厥若與夫子察其所安同意夫羽可積而沈也石可載而浮也此非其所順者也而所以順者則羽終于浮石終于沈而已君子而不仁者有之而其所順則終為

君子而已小人於暫時之間亦能勉強終為小人而已此其所順者也既自我而知其人才之所順然後大乃使之為治相助我所受之民和諧我庶獄庶慎之事民謂之受民者人主之有民皆受之天受之祖宗也時則勿有間之是不以已間之即罔攸兼罔敢知之意也我其立政我其灼見厥若此聖人之所以立已者時則勿有間之此聖人之所以忘已者也自一話一言我則末惟成德之彥以又我受民此無時而不

在賢也雖一話言之頃終思夫成德之彥者用之以
治我受之民則用賢之心豈復有須臾毫髮之間斷
哉末終也惟思也成德之彥老成之人有德之美者
也

嗚呼予旦已受人之徽言咸告孺子王矣繼自今文子
文孫其勿誤于庶獄庶慎惟正是乂之

周公又更端而嘆曰予旦之言皆美者也我之美言
皆有所受于人而非已之私言也成王不可以周公

之私言而倦于聽周公平日所以得于師友得于傳聞者今已盡告孺子使孺子知為王之重矣言受諸已而已無所私言盡于君而已無所隱成王聽之當如何哉自今以往不特孺子為王當以是為戒自成王而後凡為文王之子孫者皆當以是為戒庶獄乃人命所係庶慎乃機密所係不可以輕委諸其人輕委諸其人是誤于庶獄庶慎也惟得其正者是者而後治之正對邪而言也是對非而言也凡天下之

君子所為無不正所見無不是凡天下之小人則反
正而為邪變是而為非為天下而得正是者又之安
有庶獄庶慎之誤哉周公言謂之繼自今謂之文子
文孫則周公豈特為一時言哉蓋為千萬世而言之
也其思之已深而慮之亦已遠矣

自古商人亦越我周文王立政立事牧夫準人則克宅
之克由繹之茲乃俾乂國則罔有立政用愼人不訓于
德是罔顯在厥世繼自今立政其勿以愼人其惟吉士

用勸相我國家

周公歷舉夏商文武所以用人之道矣至此舉商周而不及夏則又取其至近者言之蓋周視商為近視夏為遠矣世有遠近之不同而用人之道未嘗不一自古商人亦越我周文王所以立者以其任立事牧夫準人之官即三宅之臣也則克宅之謂其人居其位而安之也有乃事之才而居乃事之位者然後為安非其人而居此位則有所不安矣乃牧乃準亦然

既得其人以居此位苟不能由繹之於心則無以盡其人之才所謂由繹者不以一人譽之而信亦不以一人毀之而疑使吾之心無間於賢者之心使賢者之心有以深信乎吾之心則可以使之展布四體而為治矣蓋惟知之深者然後有以盡人之才也國則罔有立政者不能監商人文武之用賢則國無政矣易曰上下不交而天下無邦此國則罔有立政者也其所以任有立政者以其用儉佞之人不順于德者儉

佞不順德之人世之所謂小人也用此人以置之周
行百執之列則人主安有顯名于世哉繼自今以往
不特成王也凡所立政者勿以儉人之不可用則當
知有吉人之可用儉人乃傾覆不常讒諂面諛之人
吉士則溫良忠厚常德之士也用吉士則吉士必能
勉力相輔我之國家矣周公深見治亂之本原在于
儉人吉士用與不用之間故言之為尤切

今文子文孫孺子王矣其勿誤于庶獄惟有司之牧夫

其克詰爾戎兵以陟禹之迹方行天下至于海表罔有不服以覲文王之耿光以揚武王之大烈

周公併告文王之子孫今孺子成王今已為王矣其不可以誤于庶獄人命所係常謹擇其有司牧夫主于養民者而委任之刑所以愛民而非毒民之具也苟用之不得其人則必輕于用刑不以愛民而以毒民矣周公始者言文王罔攸兼于三者列而言之是三者皆在所重也既而又曰其勿誤于庶獄而庶慎

不與焉則庶獄又重于庶慎矣周公曷為而以庶獄
為重也刑獄之事死者不可復生刑者不可復贖聖
人之仁心于此而寓焉孟子曰三代之得天下也以
仁觀庶獄之重于庶言庶慎則三代之仁可見矣周
公既言刑之不可輕用併與兵而言之兵者亦刑之
大者也惟知所以重于刑必知所以重于兵兵刑無二
理也曹劌之諫莊公曰小大之獄雖不能察必以情
曹劌曰忠之屬也可以一戰是兵之與刑正相關也

知刑之重則用刑者不可忽知兵之重則用兵者不可忘周公非教成王以窮兵黷武也天下雖安忘戰必危當成王守成太平之世苟習于久安無事而忘其用武則四方將有窺伺之心而人主威權將委靡不振矣故周公戒以詰爾戎兵治爾戎兵之事也陟禹之迹乃五服也陟升也升禹之舊迹方行天下使兵威所及至于四海之廣海外之表無有不服惟此可以觀文王之耿光揚武王之大烈盖有文王之耿

光武王之大烈為之子孫者苟委靡不振威權不足以御其下則雖有取光何自而能見雖有大烈何自而能揚哉此守成之世人情易于玩弛故周公以兵為戒其後成王得周公之意撫萬邦巡侯甸四征弗庭綏厥兆民康王得成王周公之意故康王之誥曰張皇六師無壞我高祖寡命平王東遷以後不知此意以至征伐自諸侯出而其弊下陵上替蓋以此也說者以為立政之書專言用人而不及兵刑則遂疑

此非此篇之文脫簡於此非也周公之言本末兼舉不可專就一事以觀之孰非政也而兵刑為大則用人以之立政何害其言兵刑哉亦猶無逸之書戒以無逸而已而末章又及于聽言亦此類也

嗚呼繼自今後王立政其惟克用常人

周公至此總前章而申之曰繼自今後王自成王而後也凡立政之道無如用常人孔子曰人而無恒不可以作巫醫善夫不恒其德或承之羞立政之所謂

常亦猶伊尹之所謂一也有常而不變者世之人主
則以常人為迂闊而不足用必求其所謂新奇者而
用之好戰者以言兵進好利者以言財進慘酷者以
刑法進此新奇可喜者也人主用此等人豈不敗事
哉若夫常人者聽其言若迂闊視其功效若遲鈍觀
其忠若不勇決而要其終則有成效大驗焉譬之桑
麻無異用五穀無異味參苓著術無異品而養生者
不能以外此此常人之所以為貴也此篇之中言常

者亦多矣曰常伯曰常任曰庶常吉士曰乃克立茲
常事至此又曰其惟克用常人知此則人主之用人
當知所以決擇矣

周公若曰太史司寇蘇公式敬爾由獄以長我王國茲
式有慎以列用中罰

周公呼太史使書其事以為後世法也司寇蘇公即
蘇忿生也當時為武王司寇能以式法而敬其所用
之獄以長我王國使王國享其長久而受國家無窮

之福者皆由夫蘇公用刑之得其當後世所當用之
為式謹而行之列皆也列用中罰言其刑罰咸得其
中不失之輕亦不失之重周公舉此者使太史書其
事以詔後世擇典獄之人而用之當如司寇蘇公可
也周公終篇之意猶惓惓于用刑

尚書詳解卷三十九

欽定四庫全書

尚書詳解卷四十

宋 陳經 撰

周官

周書

周官之書乃立政之效也二篇大率相為表裏傳說之告高宗曰知之非艱行之惟艱周公作立政以戒成王成王不但知之而已又且推而見于躬行苟成王不能躬行周公之訓則言為徒言知為徒知而已

考此篇之書如撫萬邦巡侯甸四征弗庭即立政誥爾戎兵方行天下之意也如立太師太傅太保而下即常伯常任準人之意也如戒百官君子其爾典常作之師即其惟克用常人之意也尊其所聞則高明矣行其所知則光大矣成王所以能進於高明光大之地者其惟能尊周公而行其所言者歟不然自非踐履之深者必不能為此書也

成王既黜殷命滅淮夷還歸在豐作周官

據大誥之書微子之命之書知黜商在周公東征之時據成王立政之序與多方之敘知滅淮夷在即政之後其事非同時以其相因故連言之還歸在豐謂既滅淮夷之後歸于宗周之都天下無事始作周官夫黜商滅淮夷而繼以還歸在豐作周官何也天下既定然後可以修太平之盛典當其外侮未除外患未去君臣之間不得一日寧天下猶有梗吾治者成王雖欲訓迪厥官其可得哉于此又有以見先後緩

急各有其序而商之命不可以不黜淮夷之不可以
不滅也

惟周王撫萬邦巡侯甸四征弗庭綏厥兆民六服羣辟
罔不承德歸于宗周董正治官

此史官敘述其所以作周官之由惟成王即位之初
鎮撫萬邦時巡侯甸之服侯甸近王畿者也四征弗
庭四方征討其諸侯之不服者以綏定其兆民此皆
成王所以振勵奮發以聳動天下使諸侯不敢懷欺

以玩其上亦所以示其禮樂征伐自天子出者也六服羣辟罔不承德禹時有五服成周則有六服通王畿而為一服與侯甸男邦采衛而言之也聖人既有以威天下而後有以懷天下惟其四征弗庭綏厥兆民故六服諸侯因聖人之威自然有以懷其德莫不精白一心以奉承其上歸于宗周董正治官天下之諸侯既皆承德則四方無虞矣當國家閒暇必于是時明其政刑迨天之未陰雨必綢繆其牖戶此歸于

宗周之日所以董督而正其治謂之百官不敢後也
讀此一章有以知人主守成之道在易之泰上下交
其志同之時也九三以陽剛之才聖人于此爻發明
治泰之道曰包荒用憑河不遐遺朋亡得上于中行
治安之世人情溺于久安安于守常怠于因循憚于
改作又況人情于此易于玩法易于廢弛蠹弊自此
而生非有剛斷之才憑河之勇則不足以治泰天下
既平無事可慮則必不能為深思久遠之計故事之

隱微者人材之在下僚者未必加之意非有不遐遺之智則亦不能以治泰觀周王巡侯甸以征弗庭歸于宗周董正治官其得泰卦用憑河不遐遺之意乎王曰若昔大猷制治于未亂保邦于未危曰唐虞稽古建官惟百內有百揆四岳外有州牧侯伯庶政惟和萬國咸寧夏商官倍亦克用乂明王立政不惟其官惟其人

若順也大猷大道也順古之大道而行之自制治于

未亂保邦于未危而下皆古之大道也當未亂未危之時常致其所以為亂為危之慮故制其治而使政教之無缺保其邦而使上下之無虞此成王深見治道有無窮之憂不以目前苟安而自治也古今之變不齊治不長治者皆自人主怠忽之心生以治視治而不以亂視治以安視安而不以危視安也曰唐虞稽古建官惟百皆古人所以制治保邦之具也唐虞考古以建官其數止于百蓋其民淳事簡故也在內

則有百揆宰相之任四岳以分掌諸侯在外則有十二州之牧與乎諸侯之長皆方伯連帥之職也既曰建官惟百矣而在內則特舉百揆四岳在外則特舉州牧侯伯何也唐虞之世執要以御詳故上下相維內外相制莫不有法此亦王省惟歲之意也內舉百揆四岳之大臣而朝廷百僚之政無不舉矣外舉州牧侯伯而邦國都鄙之政無不舉矣為治之綱領莫有過于此者所以庶政得其和而政教禮刑無不理

萬國得其寧而遠近內外無不安此唐虞建官其治效所以若此也至于夏商與唐虞時異事異矣故建官之數則倍于唐虞唐虞官百夏商二百聖人觀時之會通以行典禮以唐虞之官而治夏商則廢事以夏商之官而治唐虞則空官時之不得不然也故亦克用乂也要之聖人建官雖多寡各因時而不同然其致治之意則一而已雖然記禮者之言與書不合何也禮曰唐虞之官五十夏氏官百商二百周三百

蓋禮記出于漢儒所記當以周官為正也明王立政
不惟其官惟其人立政之要不在于官之多惟在于
得其人蓋為人擇官者惟取其具官而已為官擇人
者必欲其得人焉苟不得其人徒取其具官謂之曠
官可也自非王者有明德足以灼知治亂安危之本
與乎邪正賢否之辨安能如此故曰明王立政

今予小子祇勤于德夙夜不逮仰惟前代時若訓迪厥
官立太師太傅太保茲惟三公論道經邦變理陰陽官

不必備惟其人少師少傅少保曰三孤貳公弘化寅亮
天地弼予一人

今我小子深見治道無窮故祇敬而勤勉于為德夙
夜之間常如有所不及然此三句乃訓迪厥官之本
也惟其人主不自以為能故不自用而用人所以立
三公三孤六卿無不得其人也苟人主自以為能是
自用而不用人也三公三孤六卿豈知所以擇人哉
仰惟前代唐虞夏商所以迪官之意而順訓之若亦

順也迪蹈也即前人所以建官之法順訓而迪蹈之
然則唐虞官百夏商二百周三百六十安在其能訓
迪厥官哉蓋惟識時變者斯足以行古人之法不識
時變惟區區陳迹之泥守雖則法古適所以為變古
則知成王所謂前代時若訓迪厥官者得其意而不
泥其迹也立太師太傅太保謂之三公先儒釋之曰
師天子所師法傳傳相天子保保安天子文王世子
曰師也者教諸以事而諭之德保也者謹其身而輔

翼之使歸諸道三公之官其職果安在乎曰論道經
邦變理陰陽者三公之職也坐而論道謂之三公為
國者以道為經而以政事緯之是三公之官與天子
論道上以格其君之心初不斷獄聽訟簿書期會之
末也人主之心既正則百姓安于下而人得其和則
天地之和應之所以變理之責者在此而已豈復如
後世災異之說與縱閉之術用求之于渺茫不可測
之間而後謂之變理乎三公之職如此其大故官不

必備惟其得人有人則居其位無人則闕之不可以
非其人而居此位也古人所以重其官如此重其官
所以重其責也必能論道經邦必能變理陰陽者然
後可以處此若夫自以為能論道經邦能變理陰陽
至于人主之心不格百姓不得其和日月薄蝕五星
失次水旱相仍妖孽並作此豈可誣也哉成王于此
篇舉三公之職至于周禮則有六卿而無三公何也
曰此古人之深意也三公萬化之本原故無定員不

可以職事言三公而有職事則事一有司而已古人之意不立員者所以見有司之職皆由三公而出而三公非有司之職也論道經邦變理陰陽持其大者而言之耳至若太保率東方諸侯畢公率西方諸侯自陝以東周公主之自陝以西召公主之是三公亦統諸侯也至若鄉老二卿則公一人鄭康成謂三公內與王論道中叅六官之事外與六鄉之教是三公以教乎民也以其無所不統而不可以一職拘之故

周禮不立三公之職雖然周之六卿乃三公兼之也
顧命之書曰乃同召太保奭芮伯彤伯畢公衛侯毛
公是召公領冢宰畢公領司馬毛公領司空矣惟周
公位冢宰正百官是以公兼卿也春秋有宰周公是
以卿而兼公也自是而後不知古人建官之深意漢
以太尉為三公太尉武官也何以得與三公又其後
以司徒司馬司空為三公司徒司馬司空古之卿也
何以為三公之官名既不正故三公皆存其名而其

實不舉矣。雖漢人竊其變理陰陽之意，而以災異策免三公，似矣。殊不知三公而遇災異，自知其失職而去可也。人主以災異而策勉之，不惟人主無畏天之誠，反移過臣下，而所以待大臣之禮意亦已薄矣。少師少傅少保曰：三孤孤特也。言卑于公，尊于卿也。特置此三者，所以贊貳三公而弘大三公之化也。何以知之？文王世子曰：太傅審父子君臣之道，以示之少傅。奉世子以觀太傅之德行，而審諭之，可見三孤贊

貳三公而弘大其化也寅敬也亮明也敬明其天地之道以輔一人使人主知所以畏天也公孤之位不同故其人才亦亞于公者也三公則變理陰陽是陰陽之權皆在三公也孤則特敬明天地是以一人而奉天之意也三公不言弼一人三孤言弼一人是三公者人主之師不敢以弼一人待之也比公孤之所以異也

冢宰掌邦治統百官均四海司空掌邦教敷五典擾兆

民宗伯掌邦禮治神人和上下司馬掌邦政統六師平
邦國司寇掌邦禁詰姦慝刑暴亂司空掌邦土居四民
時地利六卿分職各率其屬以倡九牧阜成兆民

此章其詳見于周禮其目則總于周官冢宰即周禮
太宰之職也掌建邦之六典是治教禮政刑事皆兼
領之天官之職與他官不同他官掌一官之事天官
掌六官之事此宰相之職也故曰掌邦治謂之治則
合禮教刑政言之也統百官據天官其屬六十安有

百官以其兼掌六典故總謂之百官均四海均平也
使四海各得其平賢者居上不肖者居下則賢不肖
得其平貴不陵賤賤不犯貴則貴賤得其平推此以
往無適不平古之宰相如謂之阿衡謂之平章皆取
均平之義也司徒地官之卿也掌邦教以教民自堯
舜以來有之使契為司徒教以人倫是也敷五典即
君臣父子兄弟夫婦朋友五者常行之道敷布其條
教以教之擾馴也教之以漸而待之以雍容不迫匪

亟匪緩之謂也宗伯春官之卿也掌邦之禮宗廟祭祀之事天地神祇人鬼也謂之治神人者使神人之祀皆得其理而不亂也和上下者宗伯所掌不特祭祀之事如吉凶軍賓嘉之禮亦掌之而其上下使尊卑有別先後有等舉皆和而無乖爭也聖人之治既有教以教之禮以和之其有不順禮教者于是大則有兵小則有刑司馬掌兵戎之事也故謂之政政者正天下之不正也故統六師以平邦國凡四方諸

侯有負固不服有內外亂鳥獸行者皆司馬討伐之
司寇掌刑禁之事也故曰掌邦禁詰窮治之也姦邪
慝惡隱而難見則窮治之暴亂惡之已著者則刑之
司空冬官掌邦土所以繼之司寇之後者既有教與
禮以導之又有兵與刑以禁之則民始得以安其居
故司空掌邦土度地以居民使士農工商各不相雜
順天時以分地利授之以土也六卿分職凡此六卿
各分其職謂掌禮者不叅之以刑掌教者不叅之以

事各率其屬謂六官各有屬六十六卿為之長以率之使為九牧之倡同于大成其民而已內外之官雖其職有不同而成民之意則一此又有以見古人之治上下相維內外相制絲牽繩聯未始間斷舉郡國之事總之州牧侯伯之事統之六卿舉六卿之事總之天子猶身之使臂臂之使指也猶心之于五臟五臟之于四肢百體也

六年五服一朝又六年王乃時巡考制度于四岳諸侯

各朝于方岳大明黜陟

上文言六卿之率屬在內之官也自六年五服一朝而下在外之官也六年之中五服各一朝至六年而始遍周禮行人之職侯服歲一見甸服二歲一見男服三歲一見采服四歲一見衛服五歲一見要服六歲一見周官上文六服羣辟罔不承德而六年一朝則曰五服何也蓋要近于蠻夷之地不必其來之意也禮法之所治者有詳略而德化之所施者無遠

近要服之難制已久先王特為制朝貢之禮而不必其來故武成序諸侯之助祭洛誥稱諸侯之和會康誥陳諸侯之聽從皆止言侯甸男采衛之君而要服不與焉此詳內略外之意也又六年王乃時巡又六年則十二年之間五服諸侯經二次來朝矣故天子出而巡狩以省方觀民時巡者如舜典春東夏南秋西冬北也考制度于四岳天子巡狩至于方岳之下者考其制度恐國有異政家有殊俗侯邦之正朔侯

邦之禮樂與王政之正朔禮樂同乎異乎舜典所謂
協時月正日同律度量衡之意同也諸侯來朝于方
岳之下大明黜陟之法有功者加地進爵無功者貶
地黜爵也十二年之中人情久而易玩玩則變法易
令由此而起故古者天子巡狩皆所以檢察之然而
唐虞之制五載一巡狩羣后四朝而成王則六年五
服一朝十二年而一巡狩唐虞之制九載朝績而成
王則三歲計羣吏之治此皆聖人識時知變時有古

今事有繁簡則其法亦不得而同也

王曰嗚呼凡我有官君子欽乃攸司慎乃出令令出惟行弗惟反以公滅私民其允懷

自大明黜陟而上皆法制也自凡我有官君子而下皆戒勅之辭也先王之待官吏本末無不詳盡使吾專以法制待之而官吏有出于法制之外則如之何先王于法制之外又有諄諄告教使誠浹洽于士大夫之心然後法不為徒設矣凡我有官君子大夫以

上也欽乃攸司各謹汝之所司使為冢宰而不能統
百官均四海則冢宰失其職司使為司徒而不能敷
五典擾兆民則司徒失其職司以至于宗伯也司寇
也外而諸侯也莫不皆然謹乃出令當其令未出之
前致其審可也及其令之既出則有行而無反矣令
如反汗則民疑而不信矣然則令之出而利于民則
不反可也令出而不便于民豈可不反乎曰慎乃出
令于令未出之時致其謹則審其利害必其利民而

無害者也凡人之情不知謹于未令之時徒知反于
既出之後則何以示信天下乎以公滅私民其允懷
民心既知有至公之理所謂公則悅是也公則一私
則萬殊惟其公則已之心自有以合民之心豈有不
一惟其私則所見各不同豈有不萬殊以公滅私則
所謂欽攸司慎出令者無往而非公矣

學古入官議事以制政乃不迷其爾典常作之師無以
利口亂厥官蓄疑敗謀怠忽荒政不學牆面莅事惟煩

成王知有官君子其本原處皆在于學古然後可以
入官謂其能多識前言往行能致知窮理則見事自
明所以能議事以制所以能典常作之師昔子產鑄
刑書叔向非之曰昔者先王議事以制不為刑辟則
議事以制者謂其不拘于法因時之宜商議其可否
而制之也能達乎時之宜則處事無不當其有迷
惑乎典常者載之于典冊可以共守者也以典常為
師法是循乎古也既達乎今之宜又循乎古之法自

非學古者其能如是哉成王既示之以學古之為得則又戒之以不學之為失凡以利口而亂厥官也蓄疑敗謀也怠忽荒政也皆其不學牆面之故也利口者辯佞之人作聰明以亂舊章者凡人知典常之可法則其人必厚重必寬大不知典常之可法出新意以變法亂政者必利口故曰無以利口亂厥官也蓄疑者必敗謀蓋人心務要公正明白若夫懷疑猜于中則其心必昏闇以之謀事必不善故曰敗謀舜之

所以百志惟熙者以其疑謀勿成也唐德宗之所以
用邪而不用君子者以其多疑故也急忽荒政民生
在勤勤則在敬苟萌一毫急忽之心則今日廢一事
明日廢一事事之不舉者多矣豈非荒政乎凡此數
者利口蓄疑急忽皆根于不學學則有所見必不利
口不蓄疑不急忽人而至於不學則如面牆然無所
見也無所見則安得不利口蓄疑急忽哉以不學之
人而臨事則胸中膠膠擾擾事之千變萬蹟紛亂於

吾心此其所以煩也以明理之人處事投之紛擾而不亂處之以至難而不懼蓋其理素定於胸中也然則學其可已乎成王之所得者自其學有緝熙於光明敬止故如此

戒爾卿士功崇惟志業廣惟勤惟克果斷乃罔後艱位不期驕祿不期侈恭儉惟德無載爾偽作德心逸日休作偽心勞日拙居寵思危罔不惟畏弗畏入畏

前言凡爾有官君子則并卿大夫而告之此言戒爾

卿士則又專指六卿而告之六卿其職為尊其所掌
為甚重者也功之崇也惟在于立志業之廣也惟在
于勤勞蓋爾卿士所當為者上而尊主下而庇民孰
非功業乎自其已成者言之謂之功自其始修者言
之謂之業志者其所向在此也所期者大則功必大
如伊尹居莘之野欲堯舜其君民之志也勤者勉力
而修之無有作輟也所勤者不怠則其業必廣如周
公仰而思之夜以繼日此勤也勤所以成此志非勤

之外別有功也然而志也勤也其要則在於果斷蓋蓄疑所以敗謀而猶豫者不足以成事志非果斷則不立勤非果斷則易倦斷在必為而不見其有艱難辛苦之後患則功業無有不崇而廣也乃罔後艱者不見其為難也雖然知有志有勤者果斷矣然而處富貴之地苟非獨立有見者鮮有不移於驕侈蓋人只有一心不如此則如彼于此有所重必於彼有所輕故又戒之以驕侈位不期于驕而驕自生祿不期

于侈而侈自至此世俗之常情也不為驕侈之所移者君子之特立也欲其不驕則莫如恭欲其不侈則莫如儉然恭儉豈可以聲音笑貌為哉恭儉而以聲音笑貌為則作意於為善以取名而非由內心以生也德者得於己也恭儉得于己則是善出於所性豈容有所行偽者哉德之與偽雖恭儉則同而所以恭儉則異卿士當致其辨善根于性之自然而非可作意以為之也恭儉出于德者則其心綽然有裕心廣

體胖心逸日休如此其廣大也恭儉而出于偽者則其心焦然而不寧戚然而不安心勞日拙如此其褊隘也夫人始者作偽以為善本以取名邀譽也而不知有心勞日拙者存焉其不用意于為善而善根所性本無求于心逸日休而自有心逸日休之理君子于此當有所決擇矣居寵思危謂德勝于祿雖高而不危雖滿而不溢祿勝于德則必有危之理當居寵之時常思其所以危則戰兢自持而無不畏矣惟

知畏者而終可以無所畏不知畏則禍患將不旋踵而至豈非入畏哉成王之戒卿士也開其向善之端復有以斷其為不善之路當時之聞其訓者知所以洗心滌慮矣

推賢讓能庶官乃和不和政厯舉能其官惟爾之能稱匪其人惟爾不任

此又戒之以相遜凡人所能遜者以其有樂善之心人之所以不能遜者以其有忌賢嫉能之心人而有

忌嫉之心則人亦將忌我而嫉我矣彼此相忌相嫉
安有和乎人而有推賢讓能之心則人亦將遜我矣
如禹稷臯陶更相汲引不為比周如晉范宣子讓其
下皆讓安有不和乎至于不和則在官無善政而政
多難矣天下之事善惡無不在已使卿士所舉之人
而能其官則爾卿士亦有能焉所舉之非其人是爾
之不任其責也善不善所舉也在人而舉之者在我
是亦已之善不善也為卿士者豈可不謹于舉人乎

王曰嗚呼三事暨大夫敬爾有官亂爾有政以佑乃辟
永康兆民萬邦惟無斁

周官之篇成王戒有官君子戒卿士者其辭不一而
其本末無不詳具矣至此又總而告之曰嗚呼三事
即乃事乃準乃牧暨大夫次于卿者敬爾所居之官
治爾所掌之政佑助乎爾之君以安兆民使萬邦無
厭斁于我周家成王之意謂上文所以告汝者其大
要則在此而已為君者以安民為要為臣者以佑君

安民為要使天下之民無一夫不被其澤則爾有官
君子卿士為稱職

成王既伐東夷肅慎來賀俾榮伯作賄肅慎之命

東夷即淮夷也伐東夷何與于肅慎而肅慎之來賀
蓋畏威而懷德也使成王之伐東夷也逞心于兵戎
之間以邀功為心則肅慎氏豈肯懷之哉至于此又
有以見詰爾戎兵以陟禹之迹方行天下至于海表
罔有不服其效如此王俾榮伯作肅慎之命榮伯畿


內諸侯入為王卿士周之同姓也成王賄之以幣帛
所以嘉其遠來之意而慰撫其慕義之誠故有肅慎
之命而榮伯實作書此書已亡矣肅慎氏即東之夷
也

周公在豐將歿欲葬成周公薨成王葬于畢告周公作
亳姑

周公既退老不歸于魯而在豐者周公雖退而其心
猶在周使成王于政事之間有所謀度咨問焉非謂

既退老遂忘成王也將歿欲葬成周成周即頑民所
遷之地洛邑也商民服周公之化已久師保萬民
懷其德故於垂歿之際欲葬成周者所以係商民之
心也大臣於進退死生之際如此其不苟也于既退
之日而不忘其君于將死之後而不忘乎民是周公
之心始終乎周家也公薨成王葬于畢畢者文武墓
之所在也成王不敢臣周公故葬之于文武之墓其
亦有以見成王尊德樂道之意矣既葬之後致告周

公以葬畢之事與乎遷奄之事而作亳姑之篇亳姑
即蒲姑也周公前此欲遷奄君於蒲姑至此告其已
遷矣夫子序書數言之間而周公進退死生之義得
其正成王尊德樂道之意為有加可謂辭約而理盡
矣亳姑之書亦已亡



尚書詳解卷四十

欽定四庫全書

經部

陳氏尚書詳解卷四十一

詳校官監察御史_臣查善長

通政使司副使_臣莫繩菴覆勘

總校官編修_臣王燕緒

校對官中書_臣田尹衡

謄錄監生_臣楊文憲

欽定四庫全書

尚書詳解卷四十一

宋 陳經 撰

君陳

周書

以聖人而繼聖人則其治為易以賢人而繼聖人則其治為難東郊成周之頑民周公在則周公治之周公既歿而以君陳繼其後此以賢而繼聖者也作聰明者易以紛更而變前人之法度不知自勉者易以

怠弛而壞前人之法度成王擇其令德孝恭之人有
如君陳者代之則其人必慈祥愷悌也必不至于作
聰明以變法矣然賢人之于聖人其所到必有淺深
苟不知自勉于為德則前聖之法度不能以自明所
謂守法者又非特循常襲故之謂也故此篇大抵欲
君陳懋昭周公之訓式時周公之猷訓惟曰孜孜又
曰弘周公之丕訓而孜孜繼之以爾克敬典在德能
懋昭能式能弘能孜孜能敬典則周公之訓在我運

用酹酬而不為區區陳迹而已

周公既歿命君陳分正東郊成周作君陳

成周之時分民社之寄者固多矣曾未有見于此經者而東郊之任命君陳特作一篇蓋重周公之所營也重周公之所營者重商民也分正者分其善惡而正之如畢命所謂旌別淑慝也善惡既分使為善者日以加勉而人知所慕為惡者日益愧耻而人知所畏如此書簡厥修進厥良者皆分正之意也東郊成

周卽洛邑也成周之邑爲周之東郊也

王若曰君陳惟爾令德孝恭惟孝友于兄弟克施有政
命汝尹茲東郊敬哉昔周公師保萬民懷其德往慎
乃司茲率厥常懋昭周公之訓惟民其乂

令善之德卽孝恭也事父母以孝行已以恭敬令德
之大者也惟孝友于兄弟孝于父母必友于兄弟兄
弟者同氣之親同出于父母也不愛兄弟亦不孝于
父母矣克施有政者推此孝友之心見于政事之間

慈祥愷悌溫良愛敬足以感人悟物也夫以東郊之
任其責非輕曾不聞成王擇有才術政事者命之今
乃以命孝友之君陳特曰惟孝友于兄弟何也蓋一
身者天下之本也一家者天下之則也孟子曰為政
不難不得罪于巨室而夫子亦曰居家理故治可移
于官未有身不修而能齊其家者亦未有家不齊而
能治其國者古人之觀人設施措置大抵先觀一家
之治否蓋其近者莫如家而踐履之實不可誣者也

然閭巷之人亦有能孝于親友于兄弟而不達為政之理何也曰習之而不察行之而不著由之而不知其道也令君陳以其孝友之心擴而充之以施于政豈非習之察行之著由之而知其道乎尹茲東郊之任舍君陳未見其人也又勉之曰敬哉敬則此心常存不敬則雖有孝友之令德亦將罔念而作狂矣君陳既有孝友是其化民之根本既立成王得而勉勵之培植之使以周公為準則昔周公師保萬民師以

教之保以安之民至于懷歸周公之德皆其師保之效也其條目品式紀綱法度莫不一一具在爾君陳往此東郊謹其所司謂不出其位也茲率厥常謂循其常理無妄意以生事也懋昭周公之訓謂勉而明之也記曰文武之政布在方策其人存則其政舉其人亡則其政息周公之訓雖具存苟不得其人以勉明之則周公之訓亦虛器爾明則其心通意曉惟吾所用不拘陳迹也政如此則民其有不治乎

我聞曰至治馨香感于神明黍稷非馨明德惟馨爾尚
式時周公之猷訓惟日孜孜無敢逸豫凡人未見聖若
不克見既見聖亦不克由聖爾其戒哉爾惟風下民惟
草

我聞之古人有言至治之世其芬芳之氣至于感格
神明蓋物之精華發越于外者為聲色臭味有至治
則自然有馨香其形見不可掩遏幽猶足以感神而
況于人乎況于頑民乎成王既言至治馨香之效矣

則又極本窮源而論之所謂至治之馨香者非以黍稷也以明德也有其德有其物則假物以薦其德之馨香而非專在于物也有其物無其德則物為徒物故曰黍稷非馨明德惟馨成王論馨香之效至于格神明而極其所以馨香之本則又根諸明德有是德則有是治有是治則有是馨香有是馨香則有是感應使君陳之治未至于感神而德未足以致治則安得為馨香乎又安足以化商民乎成王所以責望君

陳亦重矣然而君陳將欲為明德以何為明德無如
式時周公之猷訓惟曰孜孜無敢逸豫也猷道也訓
教也式敬也周公之所以教民者皆周公之道也爾
其式敬之惟曰孜孜以致其勤不敢萌一毫逸豫之
心人之用心苟有須臾之間斷作輟之不一則是此
心有所分已與周公猷訓相戾矣安在其為明德乎
惟孜孜惟無逸豫則心無所適心無所適則湛然而
明周公之猷謀即此心也凡人未見聖若不克見既

見聖亦不克由聖此引常人之情以為戒也常人之
情其未見聖也則企慕之心動于中如不克見然及
其既見聖之後志不勝其氣道不勝其欲其心日以
玩而不能用聖人之道矣凡人之情如此爾君陳可
不以此為戒周公之猷訓爾之所親見既見之後便
當孜孜汲汲期於由聖而後已爾惟風下民惟草化
民之本在君身草上之風必偃未有君行于上而民
不從于下君陳之臨民也有君道焉陰驅潛率之者

當在汝之身行于上而民不從者行之不篤耳至誠而不動者未之有也

圖厥政莫或不艱有廢有興出入自爾師虞庶言同則繹爾有嘉謀嘉猷則入告爾后于內爾乃順之于外曰斯謀斯猷惟我后之德嗚呼臣人咸若時惟良顯哉

周公以聖人而為政則其設施之方措置之宜因時適變不用以衆人謀度而此理自灼然于心君陳以賢繼聖苟不參人己以商議其可否則必至于失事

故戒之曰圖厥政莫或不艱凡有所謀之政事不當以輕心乘之須致其難可也惟不敢輕于舉事故有害焉之可廢利焉之可興有當出焉而從輕有當入焉而從重其疑未辨可否未決則當與師衆虞度之是參之以人謀也及其庶言皆同以為當興當廢當出當入矣則必思繹之于心以審察之是決之已見也人與己並用而不偏廢庶乎是非可否無所失也爾有嘉謀嘉猷則入告爾后于內是又稱美君陳能

如此也嘉謀謀之善者也嘉猷道之善者也爾有善則入而告其君無有懷疑情而不吐者爾又能順行此謀猷于外稱揚以告人曰斯謀斯猷皆吾君之德蓋人臣以進言為能事人君以聽言為能事當其言之進也是其善之在臣也及其君聽之君從之是其善非君之善而何天下之善無一而非君之善所謂乾知大始坤作成物其曰斯謀斯猷惟我后之德信乎其為我后之德也未民之難化患在乎君民之情

不通君有善而民不知則上之德意志慮不達乎下
若君民之情既孚君有善而臣能稱揚之民信之則
民豈有不從化乎成王稱美君陳之能如此故曰臣
人咸若時惟良顯哉使為人臣者皆能順是則臣為
良臣亦顯名於世矣

王曰君陳爾惟弘周公丕訓無依勢作威無倚法以削
寬而有制從容以和殷民在辟予曰辟爾惟勿辟予曰
宥爾惟勿宥惟厥中

惟君陳不及周公之聖故成王之意欲君陳守周公之法當如曹參守蕭何之法故又曰爾惟弘周公丕訓弘與人能弘道之弘同推而廣之以被于民者弘周公之丕訓也然則周公之丕訓安在下文所謂寬而有制從容以和以至曰忍曰容曰簡厥修進厥良者皆周公之訓也君陳居分正東郊之任是有其勢也法令具存是有其法也乘其勢位之尊以作威虐于民是依勢也借三尺以行已之私意侵削其民是

倚法也君陳當以至公存心苟有所依有所倚是此
心之有所偏也偏則私矣既不依勢又不倚法惟務
寬而有制可也政太寬則弛弛則縱縱則民玩政太
猛則殘殘則虐虐則民無所措手足本之以寬而寬
之中有隄防之意存焉則從容不迫之間自有和矣
謂之和則不失之縱亦不失之急若禹之行水焉當
順則順之當治則治之然後水由地中行無有壅遏
奔突之患矣商民在辟子曰辟爾惟勿辟子曰宥爾

惟勿宥惟厥中此戒君陳之用法不可徇君意之輕重惟當其理之輕重也殷民在辟者殷民之犯法也予以為當加之法汝不可以我之故遂加之法也予以為當在所赦宥汝不可以我之故遂從而宥之也君之喜怒無常情而法之輕重有常理舍其循君者而以循乎理之中可也惟君陳知有理之中則人君之意苟是則從君可也非從君也乃從理也人君之言苟不當則從理可也從乎理乃所以從君矣古之

有司得以與天子相可否如莫尊于人君莫重于主
勢而其言有未當理有未順則人臣得以為之春秋
之法雖重天王之命若非制命以義則君命有所不
行首止之盟以王世子出會諸侯以列國上與王世
子會此例之變也而春秋許之鄭伯奉承王命不與
是盟此理之常也而春秋逃之所以然者王以愛易
儲貳而齊威公仗正道以翼世子也此是變而之正
以大義為主而崇高之勢不與焉此春秋所以大居

正也後之人主不知此義往往以為生殺在我予奪
在我惟其言而莫予違此後之所不逮古也雖然君
陳令德君子也安有依勢倚法之事成王守成賢君
也安有任意之喜怒以生殺夫人此皆成王于踐履
之中深見私情之易勝而公理之難保既以之戒君
陳而又且不敢自恃此成王所以為賢君歟

有弗若于汝政弗化于汝訓辟以止辟乃辟狃于姦宄
敗常亂俗三細不宥

此戒君陳謹於用刑也用刑雖非君子之本心亦不可不用焉惟當謹而不妄用可也其有不順于汝之政不肯化于汝之教者此則法之所當加然必審察思慮用法于斯人而可以止其法于不用者用法可也何者刑一人而千萬人知所懼此辟以止辟也古人于刑教之中無非仁心之所寓亦猶孫子曰殺人安人殺之可也舜刑四凶而天下咸服民自不犯于有司豈非辟以止辟乎秦皇漢武嚴刑酷法以繩其

下而盜賊布滿天下終不可禁此其為辟也適以召
天下之犯法而非以止法也若所謂當加之法者如
徇于姦宄敗常亂俗之人是也徇習也習于為奸為
宄而不肯變也與乎敗壞典常之教者亂其風俗者
此皆創亂之人犯之而至於再猶可恕也犯之而至
于三則雖細罪亦當不宥之以其情之不可恕者也
舜典所謂怙終賊刑是也于汝當用法之人惟此等
人一加之法是絕其禍亂之原而人知所懼辟以止

辟在此而已苟外此而好用刑則不可

爾無忿疾于頑無求備于一夫必有忍其乃有濟有容德乃大簡厥修亦簡其或不修進厥良以率其或不良此戒君陳知所以愛民又當知所以化民知所以愛之則不可以不容知所以化民亦不可以不察心不懷德義之頑民汝不可以忿怒疾惡之其有能率教之民則進獎拔用之不可以求全責備下文又分而言之曰必有忍其乃有濟有容德乃大此即無忿疾

于碩之意也忍亦容也忍則出于制其心容則出于
無心矣人必有以制其心使無所忿疾如此則事其
有成矣有容則其量之寬大又非忍之可言也故有
含蓄而德日以大德之大則不止于有濟也由忍而
至于容由其乃有濟而至于德乃大如山海之藏疾
如山澤之納汙寬乎其有容也綽乎其有裕也此豈
非愛民之心不可以不容乎簡厥修亦簡其或不修進
厥良以率其或不良此即無求備于一夫之意也一

意于含容而不知所以分別善惡則是雜揉而民無
所激勵矣故使人也器之隨其才而舉之其有知所
以自修而恥于為惡者吾則簡而別之簡別其自修
者則不知自修之人亦有所簡別愧于中曰吾奚為
而不與厥修者簡也亦將改而為修矣其有賢良之人
其德行可用者吾則進而顯之顯進其賢良者則不
為賢良者亦知所勉勵自愧於中曰吾奚為而不與
厥良者進也亦將化為良矣此豈非化民之心不可

不察乎有以愛之又有以化之分正東郊之任其在此歟

惟民生厚因物有遷違上所命從厥攸好爾克敬典在德時乃罔不變允升于大猷惟予一人膺受多福其爾之休終有辭于永世

成王所以欲君陳無忿疾于頑無求備于一夫者蓋自心之同然者觀之以民本厚也故孟子當戰國崎嶇險詐薄俗之中而每道性善蓋自其初而觀之民

生具五常之性知愛其親敬其兄豈非厚而不薄乎其所以為薄俗而不知敦厚者以其因物而遷變猶禮記所謂人生而靜天之性也感于物而動性之欲也欲熾而滅其性則向之厚者薄矣向之厚者化而為薄而所謂厚者未嘗不存在上之人所以率之者如何耳動民以行不以言以身教者從以言教者訟違上所命者民不從君之令而從其所好也謂以身教之也汝君陳之化當自汝身始敬典在德者率之

以身也汝能敬其典常之道篤于父子兄弟之愛又
能在德愛敬出于中心之誠然而非矯飾以行之則
汝之躬行者至矣汝之躬行既至則人將化上之德
皆變其舊染之習而升進于大道蓋民必知所變而
後進于道舊俗猶存其能進于道乎至于大猷則化
頑成仁化薄成厚父子兄弟之愛篤返天理之自然
矣由此觀之民性豈不善乎民生豈不厚乎此革之
上六所謂君子豹變小人革面之時也民生至于變

而升于大猷則福在其君矣而予一人膺受多福矣
名在其君而汝君陳亦有美名于永世矣人君之福
不可以他求民得其安則君得其安是君因民以為
福也人臣之名亦不可以他求民享其休則臣亦享
其休是臣因民以為名也外此以求福是邀福也外
此以為名是干譽也頑民雖微而所係于君臣者如
此其大君陳其可忽哉

尚書詳解卷四十一

欽定四庫全書

尚書詳解卷四十二

宋 陳經 撰

顧命 周書

此篇雖凶事而死生之理始終之變古人制度纖悉
周密莫不詳見學者不可以凶事而略之生之有死
達人視之以為夜旦之常蓋人道之常然始終之義
也自非學問之深者不足以語此此成王自幼冲得

周召二公養成其德學有緝熙於光明至於臨死生
始終之變卓然不亂觀此書者當與曾子易簣春秋
書公薨于路寢之事同義是雖名分尊卑之不同而
其所以達始終之義一也雖然此經之所載固嘗言
帝乃殂落矣而無顧命又嘗書陟方乃死矣而無顧
命又嘗言成湯既歿武王既喪矣而皆無顧命成王
獨有顧命何也曰成王自艱難變故中而得之也自
堯舜禹湯文武以來百官總已以聽冢宰初未嘗有

變故而成王當幼冲之始管蔡四國流言成王致疑
其事亦殆矣凡天下經一變者長一智遭一蹶者得
一便顧命之作成王其亦折肱而知良醫歟

成王將崩命召公畢公率諸侯相康王作顧命

顧命之書乃同召太保奭芮伯彤伯畢公衛侯毛公
師氏虎臣百尹御事而孔子序書獨云命召公畢公
率諸侯蓋二公之職也三公內總百官外總諸侯故
特舉召公畢公當是時召公為西伯畢公為東伯中

分天下而治之如康王之誥曰太保率西方諸侯畢
公率東方諸侯是也成王之將崩也命名畢二大臣
率諸侯以相康王則終始之義于是乎正矣顧命者
成王臨死迴顧而為此命也雖然周官之書曰立太
師太傅太保茲惟三公是則太保次于太師也命名
公為太保畢公為太師而召公乃居先者周召二公
同功一體之人周公既歿則當國事之重任者莫召
公若也故以召公為先夫以召公之勲德與周公同

而其位乃次于畢公之後以此見古者腹心宗臣與社稷同體初不論職位之高下官資之崇卑春秋晉文公十九年在外及其成霸業無非趙衰狐偃為之謀主文公自僖公二十四入國至僖公二十七蒐于被廬始命狐偃將上軍趙衰為卿狐偃則讓於狐毛而佐之趙衰則又讓于欒枝先軫若以後世論之二臣自入國即當以高官大職處之可也經數年而後命將上軍及為卿之任也又相遜齊桓公之霸全在

管仲管仲只為下卿及平戎于王王以上卿之禮享之仲不敢受且曰有天子之二守國高在當時國子高子嘗為齊上卿然國高初無功于齊而管乃甘處于國高之下漢高祖之興全在張良其後立太子使叔孫通為太傅張良為少傅由此觀之腹心之臣本無計較官位自春秋漢世以來尚有之而況召公之大賢乎哉

惟四月哉生魄王不懌甲子王乃洮潁水相被冕服憑

玉几乃同召太保奭芮伯彤伯畢公衛侯毛公師氏虎
臣百尹御事

此作書者序成王以病之故具召其臣也惟四月始
生魄十六日也王有疾故不悅懌甲子王乃沔頽水成
王將發大命臨羣臣諸侯必當齋戒沐浴今疾病矣
不齋戒沐浴惟沔盥其手頽洗其面古人於臨死之
際猶必敬也如此扶相成王之官如太僕者被王以
袞冕加之朝服憑玉几以出命玉几乃成王所坐之

凡也乃同時召三公六卿大夫士自保奭而下是也
孔安國謂太保畢毛稱公則三公矣先後依六卿次第
冢宰第一召公領之司徒第二芮伯為之宗伯第三
彤伯為之司馬第四畢公領之司寇第五衛侯為之
司空第六毛公領之召彤芮畢毛衛皆國名諸侯入
為天子公卿也古者三公官不必備惟其人皆以六
卿兼之定公四年左氏傳曰衛侯為司寇知此六人
依禮次第為六卿也師氏中大夫掌以禮詔王居虎門

之左司王朝得失之事帥其屬守其門者虎臣即虎
賁氏也百司百官之長也御事諸掌事者蓋羣士也
成王於將崩之際召三公六卿大夫羣士憑玉几以
出命命相康王所以顯其事於衆人而公其命令于
天下天子者天下之共主當與天下之人共戴而君
之古之立君者惟恐事之不顯而衆人之不覩也然
而可以絕窺伺之端遏禍亂之原矣成王於此而正
終故康王亦自此而正其始其事暴白于天下人人

得而知之此顧命之書所以為萬世帝王之法後世之君則不然父子之間以死為諱繼承之際鮮有能正其終始者唐順宗之為太子也二十餘年而其子已壯一旦順宗病不能言而德宗寢疾之久不能召宰相屬以托孤之事至使宦者得以擬議其所立倘非因衛次公等草詔得至禁中抗議立廣陵王則其事亦危矣說者以為幾有趙高之事人主可不以此為監哉

王曰嗚呼疾大漸惟幾病日臻既彌留恐不獲誓言嗣
茲予審訓命汝昔君文王武王宣重光奠麗陳教則肆
肆不違用克達殷集大命在後之侗敬迓天威嗣守文
武大訓無敢昏逾今天降疾殆弗興弗悟爾尚明時朕
言用敬保元子釗弘濟于艱難柔遠能邇安勸小大庶
邦思夫人自亂于威儀爾無以釗冒貢于非幾

此章乃成王發大命以示羣臣也翼日乙丑而王崩
前一日甲子成王乃能發大命歷敘文武所以得天

下之由與已所以守天下其言不亂如此自非成王
學問之力何以至此嗚呼嘆而後言也漸進也疾大
進而幾危矣病者疾之甚也病且日臻既彌留日久
是以疾有增而無減必死者也予恐既死之後欲出
誓言以繼續我所欲言之志而不得故我詳審以教
命汝以見言之不苟發欲使聽之專也昔君文王武
王宣重光推言文武所以得天下之由父子以光明
之德相繼故曰宣重光奠麗陳教則肆此言文武化

民之大端治天下者以民為本民之所麗者在于衣食文武先定其民之所麗使民得所附著不至失所亦猶成湯謹厥麗耳民既有麗則衣食足矣然後可教故陳之以教既陳之以教于是使民習其教民習其教則是不違其上知所服從矣我文武所以化民如此故能革殷為周集此上天之大命在後之侗乃成王自謂也侗者倥侗自謙之辭也以敬而逆上天之威蓋天威即敬也成王以人合天故曰迓天威繼

守文武之教無敢昏貳而逾越其所守之心苟昏而
不明則必至於放縱逾越成王惟其不昏所以不逾
此數句乃成王學問所得處在此為人主者患在不
能保祖宗之業至於昏逾今成王守文武大訓不敢
昏逾則為君之責塞矣無有缺然不滿者矣今而將
死順受其正又奚憾焉今天降疾殆死生皆天理也
天降疾病於我之身其危殆矣弗興不起也弗悟不
覺也不起不覺言其必死也爾羣臣庶幾明我之言

以敬而保安元子康王成王之所得者在敬既以敬而迓天威矣今復以此敬而授之羣臣使以敬而輔康王使嗣王能大濟于艱難蓋天下本非逸樂之具乃艱難之器也惟有以濟其艱難而後可柔遠人能邇謂治近當無所不盡其能也安勸小大庶邦謂使小邦大邦皆得其安相勸勉于為善也為君之道不能柔遠能邇安勸庶邦則不謂之君矣然柔遠能邇安勸庶邦之要當自一身始有威可畏謂之威有

儀可象謂之儀爾能思夫人自治其威儀容止可觀
進退可度以臨其民爾不可以嗣子康王冒進于非
幾之事非幾與危事皆威儀之反也康王不進非幾
與危事則其所進者當自治威儀矣觀此章有以見
成王之所得于周公者惟此而已故垂歿之際以是
而付之羣臣

茲既受命還出綴衣于庭越翼日乙丑王崩太保命仲
桓南宮毛俾爰齊侯呂伋以二千戈虎賁百人逆子釗

于南門之外延入翼室恤宅宗

成王顧命羣臣已畢公卿大夫士既受命而還復其
本位出綴衣于庭綴衣即幄帳也周禮幕人掌帷幕
幄帟綬之事鄭氏釋云在旁曰帷在上曰幕帷幕皆
以布為之四合象宮室曰幄王所居之帳也然則幄
帳是黼扆之上所張之物王發顧命在此幄帳之坐
命訖乃復反于寢處以王病重不能臨此坐故徹出
幄帳於庭將欲為死備也越明日乙丑王崩太保召

公于是即命南宮毛仲桓二臣俾爰齊侯呂伋取于
戈虎賁以迎康王于南門之外夫即位大事也古者
豫建太子儲君之位欲其蚤定成王以乙丑日崩太
保亦以乙丑日迎康王入不待崇朝之間而嗣子之
位定矣則變故何從而生哉此機會之不可移時也
春秋以來魯昭公以十二月己未薨于乾侯逾年六
月癸亥公之喪至自乾侯戊辰定公即位且昭公之
薨已越葬期猶未得反至月癸亥然後喪至而定之

立乃在是月之戊辰相去六日蓋遲速進退受制於
季孫意如不得以時定也又豈知顧命之書古人之
意如此其詳密哉當是時掌兵者齊侯呂伋實太公
之後也仲桓南宮毛親信之臣也呂伋掌兵非有仲
桓南宮毛將命以往則伋亦不承也非有宰相之命
則亦不敢發也兵權散主不偏属于一人如此魯莊
公自即位之初遂以兵權授之慶父卒至于國人不
能制唐人以神策軍使宦官統之至于廢立自如然

則兵權豈可以妄授之人哉周禮虎賁氏下大夫其屬有虎氏八百人呂伋為天子虎賁氏也南門之外路寢門外說者謂古者父子異宮太子之宮在南門之外殊不知古人之意正欲使太子特出於外以兵衛再迎之而入顯示衆人明其為天子之子也夫然奸邪屏息不復有窺伺之望矣不然安有成王寢疾彌留之久太子不在其側而在南門之外哉延入翼室恤宅宗東坡先生解翼室謂路寢旁左右翼室也

成王喪在路寢故康王廬于翼室而為憂居之主也恤
憂也宅居也宗主也

丁卯命作冊度越七日癸酉伯相命士須材狄設黼宸
綴衣

宰相之權如此其重也當百官總已以聽冢宰之時
故此篇自己丑王崩之後凡稱命者皆太保之命仲
桓之取干戈太保命之冊度之作太保命之以至設
黼宸四坐陳國家之寶玉陳天子之輅車無非太保

之命命士須材言伯相而作冊度不言伯相者丁卯
之日去乙丑為近故蒙上太保命仲桓南宮毛之文
也癸酉之日去丁卯為遠故又言伯相伯相太保互
稱也以其為三公則謂之太保以其為西伯領諸侯
則謂之伯以其為冢宰則謂之相冊度者命史為冊
書法度傳顧命于康王也成王雖顧有遺命未作冊
書以此日作之既作冊書因作受冊法度下云皇后
憑玉几宣成王言是策書也將受命時升階即位及

傳命以後康王答命受同祭享皆是法度越七日癸酉伯相命士須材王自乙丑崩至癸酉為九日矣乃始命士須材者天子七日而殯于死日為八日癸酉殯之明日也太保命士致材木須待以供喪用謂梓與明器之類也狄者下士也扈者屏風畫為斧文白與黑為黼前出綴衣于庭至此復設黼扈綴衣象成王平生時所為經于四坐言設則四坐皆設也

牖間南嚮敷重篋席黼純華玉仍几西序東嚮敷重底

席綴純文貝仍几東序西嚮敷重豐席畫純雕玉仍几
西夾南嚮敷重筍席玄紛純漆仍几

此即狄設黼宸綴衣也王崩之後欲宣王命故布陳
儀衛自狄設黼宸而下王之所坐也自越玉五重陳
寶而下王之所寶也大輅在賓階面而下王之所乘
也二人雀弁執惠而下王之所衛也古人於制度典
章文物之間所以如此者豈為華侈之具哉此有深
意存焉當前王方崩後王即位之始此國家之大事

所以陳此者其一則欲象成王平生所坐所寶所乘
所衛欲以起後王愛慕之心使事死如事生事亡如
事存也其一則起羣臣百官諸侯尊敬之心想慕天
天子而繫心于嗣君也其一則以是表人主之尊天
下無二所坐如此所寶如此所乘如此所衛如此如
此其尊嚴如此其崇高富貴所以絕天下覬望之心
也古人深意不為文具由漢以來蕭何治未央宮曰
天子以四海為家非令壯麗無以重威及光武以漢

家子孫司隸官儀之舊猶足以係民心之思漢則聖人于典章文物衣服車旗之制豈無意哉牖牕也間者牕東戶西戶牖之間也天子之席三重諸侯再重則所敷重席者皆三重也舉其上席言重知其下更有席也葭桃枝也黼黑白雜繒也純緣也以黑白雜繒為緣也華玉五色玉也仍因也因生時之几不改作也周禮云吉事變几凶事仍几于牖間之南嚮所敷重者葭席以白黑繒為緣以五色玉而飾憑几此

見羣臣覲諸侯之座也東西廂謂之序底蒲蒻之席也綴雜綵也貝者水蟲取其甲以飾器物文貝有文之貝用以飾几也此旦夕聽事之座也東序西嚮敷重豐席以莞為席也畫純以五綵色畫帛以為緣也刻鏤之玉謂之雕玉此養國老饗羣臣之座也西夾南嚮路寢為太室則東西序有夾室非路寢正室也西夾之南嚮敷重筍席以蒻竹為席玄紛黑綬也以黑綬為緣以漆而飾几此親屬私燕之座也以燕親

屬不事華飾取其質也孔穎達云牖間是見羣臣覲諸侯之座見于周禮其西序之坐在燕饗座前以其旦夕聽事重于燕飲故西序為聽事之座夾室之座在燕饗座後則夾室是隱映之處親屬聽于燕饗故夾室為親私燕之座案朝士掌治朝之位王南面此西序東向者以此諸座並陳避牖間覲諸侯座也東坡曰將傳先王顧命不知神之所以在于此乎于彼乎故兼設平生之座也

越玉五重陳寶赤刀大訓弘璧琬琰在西序大玉夷玉
天球河圖在東序肩之舞衣大貝鼓鼓在西房兂之戈
和之弓垂之竹矢在東房

此一段所陳乃王者之寶也越玉五重陳寶一句乃
總下文而言之也于東西序坐北列玉五重又陳先
王所寶之器物五重者西序二重弘璧也琬琰也東序
三重大玉也夷玉也天球也謂之重者玉有一雙古
者雙玉為鼓陳寶者如赤刀大訓河圖之類皆是也

赤刀先儒謂武王誅紂時刀以赤為飾大訓者虞書
典謨也弘璧大璧也琬琰者大圭也此則陳于西序
之座北大玉者華山之玉也夷者東夷之玉天球者
雍州之玉河圖乃伏羲所畫之八卦此則陳于東序
之坐北虞書典謨之訓與伏羲所畫八卦先王皆以
為傳國之寶其重先代之遺文也如此肩之舞衣肩
者古之國名也所制之舞衣合于法度也大貝亦猶
前之文貝取其大者鼓鼓長八尺先代之器商周以

來寶之此則陳之於西房謂西夾坐之東也兌和古
之巧者垂乃舜時共工也所造之戈弓竹矢亦有法
度此則陳之于東房謂東廂夾室也舞衣戈弓竹矢
之微古人技巧之末爾苟合法度則亦寶之蓋其精
妙極于此無以復加也

大輅在賓階面綴輅在阼階面先輅在左塾之前次輅
在右塾之前

此則王者所乘之車輅也周禮巾車掌王之五輅玉輅

金輅象輅革輅木輅典輅云若有大祭祀則玉輅大喪大賓客亦如之此篇所謂大輅輅之大者即玉輅也在賓階面西階南嚮也綴輅繫綴于下玉輅之次者即金輅也在阼階面東階南向也地道尊右故玉輅在西金輅在東先輅即象輅也在左塾之前門側之堂謂之塾塾前陳車以轅向堂北面也次輅即木輅也金玉象皆以飾車故三者以飾為之名木則無飾故指木為名在右塾之前左塾在門內之西右塾

在門內之東左右皆北面向堂也此皆路寢之門內
五輅取其四不言革輅者蓋革輅兵戎之用故不必
陳之

二人雀弁執惠立于畢門之內四人綦弁執戈上刃夾
兩階阼一人冕執劉立于東堂一人冕執鉞立于西堂
一人冕執戣立于東垂一人冕執瞿立于西垂一人冕
執銳立于側階

此一段乃王之儀衛也禮大夫服冕士服弁凡言冕

者皆大夫也言弁者皆士也士之衛殯與在廟同助祭乃服雀弁故執兵以衛亦用雀弁鄭康成云赤白雀如雀頭色也惠三隅矛也立于畢門之內路寢之門一名畢門也天子五門臯門庫門雉門應門路門亦名畢門亦名虎門在門者兩廂各一人故曰二人綦弁者鄭氏云青黑色曰綦戈上刃亦兵器也堂廉曰祀士所立處也在階者兩廂各二人故曰四人一人冕執劉立于東堂言冕者大夫也劉鉞屬也劉與

鉞亦兵器也東堂西堂在東西廂近階而立以備升階之人也一人冕執鉞立于東垂一人冕執瞿立于西垂瞿鉞皆戟屬東垂西垂者東西廂之階上凡言弁者在堂下言冕者在堂上堂上而言東垂西垂知在堂上之遠地階上也一人冕執銳立于側階銳矛屬也側階者堂北階上也此所陳七兵其名不同皆執兵器以為衛也畢門之內與夾兩階去殯為遠使士為之東堂西堂東垂西垂側階在堂上去殯為近

故使大夫為之先門次階次堂從外向內而敘之也
次東西垂次側階又從近向遠而敘之也觀此一章
見古者執兵以為人主之衛者皆士大夫為之所謂
侍御僕從罔匪正人者此也觀立政之書綴衣虎賁
皆選吉士而當掌親兵者乃太公之子賢者之後為
之至於執兵衛王又皆士大夫為之左右前後無非
正人氣習之所薰染人主安得心術不正晉悼公使
弁糾御戎荀賓為右使訓諸御知義羣騶如禮至漢

之宿衛猶以忠力之臣與公卿子為之猶有古意後
世苟簡人主寧近小人不肯近君子在王所者皆宦
官武夫則人主之德何由而成而人主之勢亦何自
而尊哉

王麻冕黼裳由賓階濟卿士邦君麻冕蟻裳入即位太
保太史太宗皆麻冕彤裳太保承介圭上宗奉同瑁由
阼階濟太史秉書由賓階濟御王冊命

前面鋪陳儀衛已定於是傳顧命於康王麻冕者緒

麻三十升為之皆吉服成王喪在殯何以用吉服為天下之計不得已而用之於吉服之中特示變焉周禮袞衣五章裳四章此則於裳獨用黼焉蟻裳者于裳畫蟻行往來之文也彤裳者纁裳也皆吉服示變也王麻冕黼裳由賓階躋賓階西階也不敢當阼階以其死親也故由賓階而升卿士兼公孤大夫言之也邦君諸侯也麻冕蟻裳入就班位無所執事故特言入即位太保三公也太史掌冊書者太宗即太宗伯也

此三人皆如下文所言是也皆麻冕彤裳太保則奉
介圭于王考功記鎮圭尺有二寸天子守之介大也
大圭即鎮圭也康王之所守也上宗即宗伯也或云
太宗或云上宗者大宗伯一人小宗伯二人凡三人
使其上二人也其一人奉同一人奉瑁同爵名使康
王主祭祀也瑁王之所執以覆冒天下也太保與上
宗皆由阼階而升蓋承圭奉同瑁皆是承王命故重
其事由東階而升也太史秉書即上文所作之冊也

隨王之後故王由賓階太史亦秉書由賓階御進也
進王以冊命當時公卿大夫諸侯王皆在而所以執
事則在此三人太保太史太宗而已

曰皇后憑玉几道揚末命命汝嗣訓臨君周邦率循大
卞變和天下用答揚文武之光訓王再拜興答曰眇眇
予末小子其能而亂四方以敬忌天威

曰冊命之辭也皇太后君成王也親憑玉几稱道發
揚臨終之命命汝康王繼嗣文武之大訓以臨蒞為

天下之君率循文武之大法以調燮和協天下用對
揚文武之光訓不負前人之付託此敘成王之意言
成王命汝如此也康王於是再拜而興荅曰眇眇言
其微之又微也至微之小子安能足以治四方以敬
忌上天之威乎言任大責重非小子所能當也其謙
冲退託之辭如此

乃受同瑁王三宿三祭三咤上宗曰饗太保受同降盟
以異同秉璋以酢受宗人同拜王荅拜太保受同祭齊

宅授宗人同拜王荅拜太保降收諸侯出廟門侯

康王既謙退自處以為不能當于是左手受同一手受瑁受之于上宗也既受之後王以瑁授人受同而祭禮成于三故三宿三進酒柩前也三祭三祭酒漿於神坐也三咤三奠爵于地也為此祭者告神言已受羣臣所傳顧命也祭之未必飲神酒受神之福上宗以同酌酒進王讚王曰饗福酒饗福酒畢王乃以同授太保太保受同降階盥手更洗別同祭祀以變

為敬不可用王之同也既洗異同實酒于中秉璋以
酢祭璋半圭也酢報祭也王既祭太保復報祭酒大
祭祀之亞獻也太保至殯前欲祭祀以同授之宗人
宗人即小宗伯也太保供王宗人供太保即以同授
宗人太保受拜白柩云已傳顧命王則荅拜拜柩尊
所授命也太保乃于宗人處受同而祭王則三祭太
保但一祭而已祭禮亦饗福酒宗人讚之齊者至齒
欲飲而實不飲也王謂之饗太保謂之齊者互相備

也宅受宗人同宅居也太保居其所于受福酒處足
不移為將拜故授宗人同祭既畢而更拜白成王以
事畢也太保既白成王以傳顧命事畢康王亦答拜
敬所白也禮既畢則太保下堂有司遂收器物諸侯
皆出廟門殯之所處故曰廟出路寢門外以待康王
之後命也此篇所記成王于此而終康王于此而始
其儀衛典章之盛作史者記之其文簡古深有法度
存焉

尚書詳解卷四十二